

SA LETA VINA RUA TE PAULA KOE TIMOTE **Sa Vinabakala**

Mudina sapu ta rupaha se Paula pa vetu varipusi pa Roma, si ene la tarae nia sa sa Inavoso Leana pa nana inene tarae vina made. Beto sapu gua asa, si ta tuqe vagi se Paula meke koa pule pa vetu varipusi pa totoso tanisa banara Roma, pozana si e Niro. Kaleana hola sa nana kinokoa pa vetu varipusi, meke koa ta pusi turani sa sari na tie kaleadi. Pa totoso asa si kubere lania sa sa leta vina rua hie koe Timote. Gilania Paula sapu tata kamo sa nana totoso pude tava mate.

Koasa leta vina rua te Paula koe Timote sapu keke ɻati koimata turanana pa ekelesia, si koa dia sari na vina tumatumae pude toka nia se Timote koasa nana tinavete varitokae. Sa ɻati binalabala si pude turu va ɻinjira. Tava tumatumae meke, ta sovutu si asa, pude lopu makudo helahelae nia sa rinanerane koe Karisito. Meke tozia tugo sa pude tûqe va nabua sa vina tumatumae hinokara tanisa Inavoso Leana, meke tanisa Kinubekubere Hope pa buka koana. Pude mani va tumatumae ni sa sari na tie te Karisito, meke tarae vura nia sa Inavoso Leana koari na tie pa kasia popoa doduru totoso, be guana koa pa tinasigit na ninaqunaqu tadina kana.

Tava balau se Timote koari doduru tinasuna, saripu kote boka somana mae pa vinari zamai hoborodi na pupuhudi, sapu loke lineana evaŋia, ba na kinaleana mo koari na tie pu avosodi.

Beto hoi, si va balabala nia sa koe Timote sa nana tino a soti, meke sa nana linuli pa tinioko te Tamasa, nana rinaqerane, qinono, tataru, meke sa nana kinoa va nabu pa tinasigit na ninovaqovala tadina kana.

Sari na Nati Pinaqapaqahana sa Leta

Sa zinama tataru kekenu. Hinia 1:1-2

Vinahesi meke vina qinqira. Hinia 1:3 kamo hinia 2:13

Vina tumatumae meke vina balau. Hinia 2:14
kamo hinia 4:5

Sa nana tino a soti e Paula. Hinia 4:6-18

Zinama Tuketukele

¹ Arau Paula sa apositolo ta garunuqu koe Zisu Karisito, pa hiniva te Tamasa, si kubere atu nia koa goi Timote sa leta hie. Ta garunu si rau pude qu helahelae vura nia sa vina tatara tanisa tino a hola, sapu vagia gita koasa nada tino a keke koe Zisu Karisito.

² Timote, tuqu ta tataruem, mani poni nigo sa Tamasa sa Tamada, meke sa nada Bañara Zisu Karisito sa tataru lopu ta qana kamona, na vinatukana, meke sa binule.*

Zinama Leana Koe Tamasa

³ Pa doduru qua vinaravara boni na rane, si zama leana nigo rau koe Tamasa. Nabulu nia rau si Asa meke evania rau gua sapu tonoto pa qua binalabala, pa tinavete tonotodi gua tugo sapu evania rina tiatamaqu pukerane. ⁴ Sipu balabala atui rau sari na kolo matamu, si hiva atu dogoro sisigitigo rau, pude mani ta sinji luluapae qinetuqetu sa buloqu. ⁵ Sa mua rinaqerane hinokara

* **1:2** TTA 16:1

si va balabala nau sa rinañerane, kekenono gua sapu tagoa e Loisi tatasana, sa tinana sa tinamu, meke e Iunisi sa tinamu. Meke va hinokara valeania rau, sapu agoi ba tagoa tugo kamahire sa rinañerane kekenono gua asa.* ⁶ Gua asa ke va balabala nigo rau, pude mu tavetavete valeana nia sa binokaboka sapu poni nigo sa Tamasa, totosona va opo nigo limaqu rau pude va turu igo pa tinavete koimata. ⁷ Ura lopu ponini gita Tamasa sa Maqomaqona pude koa matagutu si gita, ba pude ta sini nia tu gita sa niniranira, sa tataru, meke sa tinuqe pule.

⁸ Mu lopu kurekure helahelae nia sa nada Banara, arau ba mu lopu kurekure nau tugo, na tie ta pusiqu mo te Karisito si rau. Ba koasa niniranira sapu ponini gita sa Tamasa, si mu va namanama pude somana koa ta sigiti pa tinozina sa Inavoso Leana.

⁹ Ele ta tiokoda na ta harupuda koa Sa si gita, pude Nana tie soti tava madida, lopu koa gua koari nada tinavete leadi saripu taveti gita, ba koa gua tu koasa Nana hiniva soti, meke sa Nana tataru lopu ta nana kamona. Asa sa tataru, sapu ele poni maeni gita Sa koe Zisu Karisito, sипу lopu ele ta kuri tu sa kasia popoa. ¹⁰ Koasa minae hie tanisa nada Hinarupu se Zisu Karisito, si ta dogoro kamahire sa tataru. Meke ele va kilasia Sa sa minate pude lopu mate sari na tie. Meke koasa Inavoso Leana si va dogoroni gita Sa sa tinoa hola.

¹¹ Na apositolo ta garunuqu si rau pu ele vizatau sa Tamasa pude na tie variva tumatu-

* ^{1:5} TTA 16:1

mae, meke pude helahelae vura nia sa Inavoso Leana hie.* ¹² Asa sa ɳatina sapu ta sigiti ni rau hire, ba namu lopu hite kurekure si rau, sina gilania qua si Asa sapu ranea rau. Meke gilana valeania rau sapu lopu kaqu ta okipalae hoboro sa qua tino a na tinavete, meke ranea rau sapu korapa kopu nia Sa osolae kamoa rau sa rane vinaripitui mumudi. ¹³ Mu tuqe va nabui na luli valeani sari na zinama hinokaradi saripu ele va tumatumae nigo rau, pude guana keke kineha vina tumatumae pude lulia goi, turanae sa rinanerañe na tataru pa nada tino a keke koe Zisu Karisito. ¹⁴ Pa korapa ɳiniraɳira tanisa Maqomaqo Hope sapu koa koa gita, si mu kopu ni sari na zinama hinokara, saripu ele va tumatumae nigo rau.

¹⁵ Gilani mua goi sari Paezelusi e Heremozenisi, meke sari doduru tie te Karisito pule pa pinaqaha popoa Esia saripu veko pani au. ¹⁶ Ba mani va tukania Tamasa sa tatamana te Onesiporasi, sina hoke va qetu au sa soku totoso, meke lopu hite kurekure nia sa sapu na tie ta pusiqu si rau. ¹⁷ Ba totoso kamo tugo sa pa Roma, si podalae ene hatahatau sa, osolae dogorau tu sa. ¹⁸ Mani ponia sa Banara koa sa, sa tataru variva taleosae pa rane vinaripitui mumudi. Agoi ba gilania tugo sapu pa soku siraña si toka nau sa si rau pa Episasi.

2

Na Tie Varipera Ta Ronuna te Zisu Karisito

* **1:11** 1 Tim 2:7

¹ Ke agoi, na tuqu, mu koa va ɳin̄ira pa mia sinoto koasa Bañara, koasa tataru lopu ta ɳana kamona, pu poni nigo e Zisu Karisito pa tinoa keke koa Sa. ² Sari na vina tumatumae pu ele avosi goi koa rau pa kenudi ri soku tie va sosode, si mamu va tumatumae ni koari na tie ta ronuedi, pude boka va tumatumae i tugo rini sari na votiki tie.

³ Mamu somana koa gami koasa tinasigiti, guana tie varipera leamu te Zisu Karisito. ⁴ Mamu tavetavete pude va qetua sa mua Bañara kekeɳoŋo gua sa tie varipera pu hiva va qetua sa nana koimata pa varipera, ke lopu somana ni sari na tinavete tadi na tie hokara. ⁵ Mamu kopu ni sari na tinarae te Tamasa, kekeɳoŋo gua sa tie varivose haqala, sapu lopu boka vagia sa sa pinia, be lopu va tabei sa sarini pu tozi nia sa tinarae. ⁶ Mamu tavetavete va ɳin̄ira pude vagia sa mua tinabara, guana tie uma sapu tavetavete va ɳin̄ira pa nana inuma, si kaqu pakete kekenua sa sa vuana sa nana tinavete. ⁷ Ego, mamu balabala i saripu gua zama ni rau hire, sina kote va gilana nigo sa Bañara sari doduru tiɳiton̄a.

⁸ Mu balabala ia se Zisu Karisito, sapu turu pule pa minate, pu gore mae gua pa tutina e Devita, gua sapu va tumatumae nia sa Inavoso Leana, sapu tarae vura nia rau. ⁹ Asa sa Inavoso Leana, sapu ta sigiti nia rau, meke ta pusi nia seni rau, guana keke tie kaleana. Ba sa zinama te Tamasa si lopu boka ta pusi. ¹⁰ Gua asa, ke somana ta sigiti ni rau sari doduru tie ta vizatadi te Tamasa, pude arini ba kaqu vagia tugo sa

tinaharupu, sapu koa koe Zisu Karisito, meke va kamo gita pa tinoa hola.

- 11** Hinokara sa zinama hie:
Be ele mate turāne koe Karisito si gita,
si kaqu toa turāne tugo koa Sa si gita.
- 12** Be koa va ninira pa tinasigit si gita,
si kaqu somana tagoa tugo gita sa niniranira
koasa Nana Binañara.
Be oso nia gita sapu na tie tanisa si gita,
si kaqu osoni gita tugo Sa si gita.*
- 13** Be guana lopu koa ranerañe si gita,
ba lopu boka hobei Sa sari Nana zinama,
sina lopu na tie kokoha si Asa.

Sa Nabulu Tavetavete sapu Va Qetua sa Tamasa

14 Mamu va balabala ni koari na tie te Tamasa vasina sari na ginugua sara, pude madi somana pa tinasigit. Mamu va balau zoñazona ni tugo pa kenuna sa Tamasa, pude madi lopu varivari tokei ni sari na zinama, sina loke tinokae hokara boka vagi ni saripu gugua arini, ba novalia mo sa rinañerañe tadirini pu va avoso. **15** Mamu tavete valeania sa mua tinavete ninabulu, pude boka va qetua sa Tamasa. Guana nabulu sapu lopu kurekure nia sa nana tinavete, sina variva tumatumae va tonoto nia goi sa zinama hinokara te Tamasa. **16** Mu lopu somana ni sari na zinamazama duviduvilidi, na hoborodi, sina kote va ilolae taloa i rini koe Tamasa sari na tie. **17** Sa vina tumatumae sea si araha la, kekeñono guana tubu variva matena, sapu toa meke lopu boka ta salaña. Ari Haimeneasi e Piletasi sari karua

* **2:12** Mt 10:33; Lk 12:9

tie pu variva tumatumae nia sa vina tumatumae kokoha gua asa. ¹⁸ Zama sari kara, sapu sa nada tinuru pule si ele ta evaṇa tu koa gita, gua. Ke ele ilolae taloa sari kara koasa vina tumatumae hinokara, meke ḥoṇovalia ri kara sa rinañeranē tadi kaiqa tie te Karisito. ¹⁹ Ba sa patu sinokirae sapu ele vekoa Tamasa pa Nana vetu sapu sa ekelesia, si turu va nabu. Meke koasa patu sana si ta kubere sari na zinama gua hire: “Gilani Nana sa Tamasa saripu Tanisa,” meke, “Asa sapu zama, arau si tanisa Bañara gua, si mani luara pani sari nana tinavete kaleadi,” gua.*

²⁰ Koa ke vetu arilaena si koadia sari na votivotiki tīnitoṇa: Kaiqa si ta tavetae siliva, kaiqa si na qolo, kaiqa sina huda, meke kaiqa pule sina pepeso. Kaiqa si pude tavetavete ni pa vinarigara arilaedi mo, meke kaiqa pule si tadi na tinavete hoborodi mo. ²¹ Meke koari na tie ba kekeñono gua tugo asa. Be va ilolo pule nia sa tie koari doduru vina tumatumae kokohadi sara, si kote na tie pu garona pude nabulu nia sa Bañara pa doduru tinavete arilaedi. Sina madina si asa, pude tanisa Bañara mo, meke tava nama si asa, pude taveti sari doduru tinavete leadi. ²² Ego, mu govete nia sa hahanana vinari riqahi tadi na tie vaqura. Mamu luli valeania sa tinonoto, na rinañeranē, na tataru, meke na binule; somanae koari na tie pu vahesia sa Bañara pa bulo viana. ²³ Mu lopu somana ni sari na vinari zamai duviduvilidi na hoborodi, gilania mua sapu sa vina betona si kote kamo pa vinaripera. ²⁴ Sa nabulu tavetavete tanisa Bañara, si lopu kote

* **2:19** Nab 16:5

koa vari tokei si asa. Ba kaqu tataru ni sa sari doduru tie, meke na tie bokabokana, na noño pa nana tinavete variva tumatumae si asa. ²⁵ Mani va tumatumae ni pa ninoño saripu lopu va egoa sa nana vina tumatumae hinokara. Sina hokara kote va malumi Tamasa si arini pude kekere, meke tiqe va hinokara. ²⁶ Meke tiqe kote pulepaho si arini, meke taluarae koasa sipata te Setani, pu hena vagidi visoroihé, meke vata evañae ni nana tie pude va tabe sari nana hiniva.

3

Sari na Rane Mumudi

¹ Mu tumae nia si hie; Kote kamo mae sari na totoso kaleadi sisigiti koari na rane mumudi. ² Sari na tie si kote balabala pule sisigiti ni, na tataru poata, vahesi hesi puleni pa dia zinama, doño pule ni dia binokaboka, zamazama noñovala, va kari tiatamadia, qumiqumi sisigiti, meke loke dia pinamaña koe Tamasa. ³ Meke loke dia tataru, lopu variva taleosae. Hoke zutu kokoha, meke lopu boka tuqe puleni, ba noñovala sisigiti, meke lopu tataru nia rini sa lineana. ⁴ Meke kote qora ni rini sari dia baere, na vahesi pule sisigiti ni, meke hata sisigitia rini sa qinetuqetu pa tinoa tini, hola nia si pude va qetua sa Tamasa. ⁵ “Gami si na tie te Tamasa,” kote gua si arini, ba lopu kote ta dogoro sa tinoa hinokara koa rini. Mu lopu va gunagunana ni sari na tie gugua arini. ⁶ Kaiqa rina titisa kokohadi hire, si hoke nuquru la pa vetu tana votiki tie, meke sekesekai ni rini sari na barikaleqe duviduvilidi, saripu balabala

mamata ni sari na dia sinea, meke ta turana koari dia inokoro seadi. ⁷ Sari na barikaleqe hire si hoke hiva va gilagilae doduru toto, ba lopu hite boka gilania rini gua sapu hinokara. ⁸ Sari na titisa kokohadi hire si kana ia rini sa hinokara, kekeñono gua tugo ri Zanesi e Zaberesi sapu kana ia se Mosese pukerane. Lopu hoke balabala valeana si arini, meke lopu tagoa rini sa rinanerane hinokara.* ⁹ Ba lopu kote boka hoda ia rini sa dia tinavete ninae rane, sina kote ta dogoro mo sa dia dinuviduvili koari doduru tie, gua sapu ta evaña koari Zanesi e Zaberesi pukerane.

Vina Tumatumae Vina Betobeto

¹⁰ Ba agoi si ele tumae valeani mo sari na qua vina tumatumae, na qua hahanana, meke sa qua hiniva pa tino. Meke ele gilania mo goi sa qua rinanerane, na ninoño, na tataru, meke ele gilania mo goi sapu boka koa va nira ni mo rau sari na tinasuna, ¹¹ na ninovañovala, na tinasigit kaleadi hola saripu ta evaña koa rau pa Anitioki, pa Aekoniami meke pa Lisitara. Ba tava sare si rau koe Tamasa koari doduru arini.* ¹² Kaqu ta ñonovala gua asa sari doduru tie pu hiva keha lulia sa Tamasa pa tino keke koe Zisu Karisito. ¹³ Meke sari na tie kaleadi na tie va gulegulea pule ni, si kaqu gigiri hola la tu pa kinaleana, meke kaqu sekesekai ni rini sari na votiki tie, meke sekesekai puleni tugo teledia. ¹⁴ Ba sapu agoi, si mu turu va nabu koasa hinokara sapu ele tava tumatumae nia goi, meke sapu ele va

* 3:8 Ekd 7:11 * 3:11 TTA 13:14-52, 14:1-7,8-20

hinokara valeania goi. Na gilani mua mo sari na tie pu va tumatumae igo. ¹⁵ Na tumae ni mua mo goi sari na Kinubekubere Hope, seunae gua kobukoburumu goi, sapu boka poni nigo sa ginilae, meke turāna la nigo koasa tinaharupu, sapu vagia goi koe Zisu Karisito pa korapa rinanerane. ¹⁶ Doduru Kinubekubere Hope si ta siñō mae di koe Tamasa meke arilaedi pude tava tumatumae, pude nonore, va tonotonoto, meke va bokaboka pa tinoñoto, ¹⁷ pude sa nabulu te Tamasa si mani va namanama va leana pude bokaboka si asa koari doduru votivotiki tinavete leadi.

4

¹ Pa kenuna sa Tamasa meke e Zisu Karisito, sapu kaqu varipitui ni sari na tie toadi meke na tie matedi, pa Nana pinule mae meke pa Nana Binanara, si garunigo rau, ² pude mu tarae nia sa Zinama te Tamasa. Mamu koa va namanama pude tozi vura nia doduru totoso be qetu nia babe lopu qetu nia rina tie. Mu norei, na va tonoti, na va niñirai, meke va tumatumae i sarini pa doduru niñono. ³ Sina kote mae sa totoso, pana lopu kote hiva va avosi rina tie sari na viña tumatumae leadi. Ba kote hiva va avosi tu rini sari na votiki vina tumatumae, meke kote hatai rini sari soku votivotiki tie va tumatumae, pude tozi ni sapu gua hiva va avosi rini. ⁴ Meke kote korodia hokara pude va talinā la ia sa hinokara, meke kote va avoso la i tu rini sari na vivinei kokohadi. ⁵ Ba agoi, si mamu kopu pule nigo koari doduru mua hahanana, turu va nabu koari na tinasuna, mamu tarae nia sa Inavoso

Leana koari na tie pude madi va hinokara, mamu tavete va gorevura i sari doduru mua tinavete ninabulu.

⁶ Ba sapu arau si ele kamo mae sa totoso, pude kaqu tava vukivukihi sa qua tinoia, meke hiera mo sa qua totoso pude taluarae. ⁷ Ele varipera nia rau sa vinaripera leana, ele haqala kamoa rau sa vina betona sa qua vinarivose, meke ele kopu valeana nia rau sa rinañerane. ⁸ Meke kamahire si korapa va naqitia Tamasa sa qua pinia, sapu sa tinoñoto tanisa Bañara. Sa tinoñoto asa, si kote poni nau sa Bañara, sa tie varipitui tonotona pa rane vinaripitui. Lopu arau mo, ba gua tugo sari doduru tie pu aqa va ñono nia sa Nana minae.

Sari na Tinepa Vina Betobeto Koe Timote

⁹ Mamu podeke sisigitia pude tuture mae koa rau. ¹⁰ Ura e Dimasi si tataru nia sa kasia popoa hie, ke luara pani au sa, meke la gua nana pa Tesalonaika. È Kiresenisi si la pa Qalesia, meke e Taetusi si la gua pa Dalamesia.* ¹¹ Telena mo e Luke si korapa koa nana koa rau he. Ke mamu vagia se Maka, mamu turaña mae nia koa rau, sina kote boka toka nau sa pa qua tinavete.* ¹² Ele garunu la nia rau pa Episasi se Tikikasi.* ¹³ Pana mae goi si mamu paleke mae nia sa qua koti sapu veko hola ia rau koe Kapasi pa vasileana Toroasi. Paleke maeni sari na Kinubekubere Hope ta viqusudi, meke

* **4:10** Kol 4:14; Plm 24; 2 Kor 8:23; Qal 2:3; Ta 1:4 * **4:11** Kol 4:14; Plm 24; TTA 12:12,25, 13:13, 15:37-39; Kol 4:10 * **4:12** TTA 20:4; Epi 6:21-22; Kol 4:7-8

gua tugo sari na Kinubekubere Hope saripu ta tavetae kapu kurukuru.*

¹⁴ Se Alekezada sapu sa tie tavete kopa, si ele nonovalau si rau, ba sa Tamasa tu kote va kilasa nia koasa sapu gua tavetia sa. ¹⁵ Maqu va balau igo koa sa, sina kana zoñazona ia sa sa inavosona e Zisu Karisito.

¹⁶ Pa qua totoso kekenu sapu lavelave pule nau telequ pa vinaripitui, si loke tie toka nau, ba luara veko pani au ri doduru. Mani taleoso ni Tamasa si arini. ¹⁷ Ba turu kapae koa rau sa Bañara, meke va ñinirau Sa pude qu tarae va hokoto ia rau sa Inavoso Leana, meke pude madi avosia ri doduru tie Zenitailo, meke pude maqu ta harupu pa minate si rau. ¹⁸ Kote harupau e Zisu Karisito koari doduru tinasuna meke kote turana va kamo valeanau Sa koasa Nana Binañara pa Mañauru. Mani koa koa Sa sa vina lavata niniae rane ka rane. Emeni.

Zinama Tataru Vina Betobeto

¹⁹ Tozia sa qua tataru koari Pirisila e Akuila, meke koe Onesiporasi meke sa nana tatamana.*

²⁰ Se Erasitasi si koa hola pa Koriniti, meke veko hola ia rau pa Mailitasi se Toropimasi, sina ta razae moho si asa.* ²¹ Mamu podekia pude tuturei mae sipu lopu ele kamo sa totoso ibu.

Dia tataru koa goi gua sari Eubulusi, Pudenisi, Lainusi meke Kalaudia, meke gua tugo sari doduru tamatasi hire pa linotu.

* **4:13** TTA 20:6 * **4:19** TTA 18:2; 2 Tim 1:16-17 * **4:20** TTA 19:22; Rom 16:23; TTA 20:4, 21:29

22 Sa Tamasa si mani koa koasa maqomaqomu,
meke sa Nana tataru lopu ta ɳana kamona si
mani koa koa gamu doduru.

**Buka Hope
The Holy Bible in the Roviana language of the
Solomon Islands
Buk Baibel long langguis Roviana long Solomon
Islands**

copyright © 2016 Wycliffe Bible Translators, Inc.

Language: Roviana

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-06

PDF generated using Haiola and XeLaTeX on 11 Nov 2022 from source files dated 30 Nov 2021

2a5324ac-61e8-5e5b-b226-f3d15850d7c5